

VENDIM
Nr.291, datë 6.5.2005

PËR DISA SHTESA DHE NDRYSHIME NË VENDIMIN NR.230, DATË 22.7.1991 TË KËSHILLIT TË MINISTRAVE “PËR KRIJIMIN E KOMISIONEVE TË TOKAVE”, TË NDRYSHUAR

Në mbështetje të nenit 100 të Kushtetutës dhe të nenit 7 të ligjit nr.7501, datë 19.7.1991 “Për tokën”, të ndryshuar, me propozimin e Ministrit të Bujqësisë dhe të Ushqimit, Këshilli i Ministrave

VENDOSI:

Në vendimin nr.230, datë 22.7.1991 të Këshillit të Ministrave, të ndryshuar, të bëhen këto shtesa dhe ndryshime:

1. Në kapitullin II “Komisioni i tokës në qark”, të bëhen shtesa dhe ndryshimi si më poshtë vijon:

a) Në fund të pikës 4 shtohet paragrafi, me këtë përmbajtje:

“Shqyrton konfliktet për tokën bujqësore ndërmjet palëve, kur për to është vendosur rishqyrtimi në rrugë administrative, me vendime të formës së prerë të organeve gjyqësore. Në përfundim të këtij shqyrtimi, kërkon nga komisionet e komunave dhe/ose bashkive marrjen e vendimeve të bazuara, ligjore.”.

b) Në fund të paragrafit të parë të pikës 8, hiqen fjalët “...”, i cili drejtohet nga kryetari i fshatit.”.

2. Në kapitullin II/a “Komisioni i tokës në komunë”, të bëhen këto shtesa:

a) Pas shkronjës “c” shtohet shkronja “c/1”, me këtë përmbajtje:

“c/1) Shqyrton mosmarrëveshjet dhe konfliktet ndërmjet individëve brenda fshatit, që kanë lindur në vijimësi të procesit të ndarjes së tokës dhe që deri në kohën e shqyrtimit nuk kanë marrë zgjidhje ligjore. Në këto raste, komisioni, pasi shqyrton dokumentacionin ekzistues të palëve në konflikt, përputhshmërinë e tij me dokumentacionin përkatës, që ndodhet pranë komunës, si dhe me dokumentet që zotëron komisioni i fshatit përkatës, merr vendim për zgjidhjen e mosmarrëveshjeve.

Vendimi i dërgohet për shqyrtim dhe miratim komisionit të tokës në qark. Pas shqyrtimit dhe miratimit të tij në komisionin e qarkut, komisioni i tokës në komunë merr vendimin përfundimtar. Ky vendim është i formës së prerë.

Objekti i vendimit të formës së prerë nuk mund të jetë sipërfaqja e tokës bujqësore, objekt i ligjit nr.8312, datë 26.3.1998 “Për tokat bujqësore të pandara”.”.

b) Pas paragrafit të parë të shkronjës c/1, shtohet paragrafi me këtë përmbajtje:

“Fshatra dhe tokë bujqësore në juridiksion të bashkisë janë të gjitha ato qendra të banuara dhe sipërfaqet përkatëse, në përbërje të ish-NB-ve, të ndodhura në periferi të qyteteve dhe që administrativisht kanë qenë në varësi të ish-komiteteve ekzekutive të qyteteve përkatëse deri në ndryshimin e strukturës së qeverisjes vendore, në korrik të vitit 1992.”.

3. Në kapitullin III “Komisioni i tokës në fshat”, të bëhen këto ndryshime:

a) Paragrafi i parë ndryshohet si më poshtë vijon:

“Komisioni i tokës në fshat miratohet nga komisioni i tokës i qarkut dhe ka në përbërje kryetarin e komisionit, i cili është kryetari i fshatit, dhe 2 ose 4 anëtarë të komisionit, specialistë, si agronomë e topografë.

Komisioni i tokës në fshat ka për objekt veprimtarie ndarjen e tokës vetëm për sipërfaqet që janë përcaktuar në ligjin nr.8312, datë 26.3.1998 “Për tokat bujqësore të pandara”. Në këtë rast, vendimet e komisionit janë të formës së prerë.”.

b) Pika 1 ndryshohet si më poshtë vijon:

“1. Merr në shqyrtim kërkesat, për tokë bujqësore, që janë paraqitur për t’u trajtuar, nga individë apo familje bujqësore, banues në fshatin ku ndodhet toka e destinuar për ndarje, sipas objektit të ligjit nr.8312, datë 26.3.1998 “Për tokat bujqësore të pandara”.”.

c) Pika 2 ndryshohet si më poshtë vijon:

“2. Verifikon pajtueshmërinë e kërkesave të paraqitura me kriteret e përcaktuara në vendimin nr.255, datë 2.8.1991 të Këshillit të Ministrave “Për kriteret e ndarjes së tokës bujqësore”.”.

ç) Pika 3 ndryshohet si më poshtë vijon:

“3. Përcakton madhësinë e tokës bujqësore dhe vendin ku do t’u jepet toka familjeve dhe individëve, që kanë paraqitur kërkesë dhe, paraprakisht, është vlerësuar se kërkesa e tyre është në përputhje me kriteret e vendimit nr.255, datë 2.8.1991 të Këshillit të Ministrave “Për kriteret e ndarjes së tokës bujqësore”. Ndarja e tokës bëhet duke llogaritur numrin e frymëve me normën mesatare të subjektit, ku është ndarë toka.”.

d) Në pikën 6 fjalët “Zyra e kadastrës” zëvendësohen me “Seksioni i Administrimit dhe i Mbrojtjes së Tokës (SAMT)”.

Ky vendim hyn në fuqi pas botimit në Fletoren Zyrtare.

KRYEMINISTRI
Fatos Nano